

DOMINGU IV ADVENTU – TINAN A

Tema

Iha loron ikus sira molok Natál, mensajen fundamentál Maromak nia Liafuan nian mak definisaun Jezús nia misaun nian: propoin projetu ida salvasaun no libertasaun nian ne'ebé lori ema sira ba deskoberta ksolok loos nian.

Evanjellu sujere katak Maromak nia projetu ne'e iha ema ida nia oin: Jezús Nazaré nian ne'ebé mai hasoru ema sira atu apresenta ba dadur sira moris-atan nian, proposta moris no liberdade nian. Nia propoin mundu foun ida, iha ne'ebé ema moris iha ninin/marjinalizadu sira no sira ne'ebé iha opresaun laran ka ema hanehan hetan fatin no sira ne'ebé terus hetan dignidade no ksolok. Ne'e anúnsiu ida ksolok no salvasaun nian, basá halo ema hotu ne'ebé rekoñese iha Jezús proposta libertadora husi Maromak, haksolok. Proposta ne'e to'o, dala barak, liuhusi limite no fragilidade “instrumentu” umanu sira Maromak nian; maibé nafatin proposta ida ne'ebé iha Maromak nia marka no kbiit.

Primeira leitura sujere katak mundu foun ne'ebé Jezús, dexendente David nian, mai propoin mak don ida husi Maromak nia domin. Jezús nia naran mak “dame”. Nia mai apresenta proposta ida kona-ba “reinu” dame no domin nian, la harii ho kbiit kro'at/kilat nian, maibé harii no hetan simun iha ema sira nia fuan.

Segunda leitura sujere katak misaun libertadora Jezús nian iha finalidade atu estabelese relasaun ida komuñaun no proximidade/babesik entre Maromak no ema sira. Ba ema sira mak konvite atu simu proposta ne'e ho disponibilidade no obediénsia – tuir Jezús Krsitu nia ezemplu – iha “sin” totál ida ba Maromak nia projetu.

LEITURA I – Miq 5,1-4a

Profeta Miqueias moris no hala'o ninia ministériu iha Judá, iha sékulu VIII/VII mK. Nia husi ambiente foho nian no koñese didi'ak problema to'os-na'in ki'ik-oan sira nian, vítima ba rai-na'in sira ne'ebé esplora ema hodi taka-matan. Husi sorin seluk, ninia moris-fatin (Moreset Gat) iha militar sira hale'u; no prezensa fortaleza militar nian no funsióriu liurai nian, halo atu makhorik rejiaun nian sofre violénsia, na'ok, impostu aas, serbisu forsadu... Buat ne'ebé grave liután mak opresór sira konsidera katak Maromak husi sira-nia parte no temi tradisaun relijioza Israel atu justifika opresaun.

Livru Miqueias nian hahú atu haktuir (kap. 1-3) salan boot Israel no Judá nian hodi subliña, liuliu salan sosiál sira, apresenta sira nu'udar infidelidade grave ba kompromisu ne'ebé asume tiha ona iha ámbitu “alianza” nian no denuncia “teolojia opresaun” nian”. Testu ne'ebé ohin propoin mai ita tama iha parte daruak livru nian (ne'ebé komentadór barak admite katak la mai husi Miqueias, maibé husi profeta anónimu ida época ezíliu nian iha Babilónia), iha-ne'ebé orákulu lubuk ida salvasaun nian, ho finalidade atu anima Povu nia esperansa (kap. 4-5).

MENSAJEN

Testu ko'alia kona-ba promesa Mesias nian. Iha kuadru ida injustisa no terus nian – nune'e frustrasaun no dezánimu nian – profeta fó sai kona-ba personajen ida atu mai, iha tempu

futuru, ne'ebé sei ukun Maromak nia Povu. Personajen ne'e, Maromak nia manu-ain, mai husi David nia uma-kain, ne'ebé iha kbiit atu lori fali tempu dame nian, justisa nian no moris di'ak ne'ebé Maromak nia Povu esperimenta iha liurai David nia ukun. Frazee ikus leitura nian ("Nia mak dame") define konteúdu konkretu esperansa ne'e nian: liafuan "shalom" uza iha ne'e signífika hakmatek, laiha violénsia no konflitu, maibé mós "moris-di'ak, moris naresin eh iha abundánsia, iha lifuan ida, ksolok nakonu.

LEITURA II – Heb 10,5-10

"Surat ba Ebreu sira" mak testu anónimu ida, hakerek, provavelmente, molok tinan 70 no nia destinatáriu mak comunidade kristán ne'ebé maioria mai husi judaizmu. Comunidade ne'e la'ós fundasaun foun nune'e ninia entuziazmu tempu uluk nian hahú sai "morna" no ladún kompromete an; difikuldade sira provoka dezánimu; no komesa iha perigu tebes kona-ba dezviu iha doutrina eh atu tuir doutrina laloos nian.

"Surat" ne'e mak apresentasaun mistériu Kristu nian, hodi subliña liuliu dimensaun saserdotál Ninia misaun nian. Hodi uza linguajen litúrjika judaika, autór apresenta Jezús nu'udar "amlulik boot" aliansa foun nian, ne'ebé halo mediasaun entre Maromak no ema sira. Autór iha ninia surat, aproveita atu refleto mós kona-ba kondisaun sarani mai husi Kristu nia misaun saserdotál: fiar-na'in sira, iha relasaun ho Aman liuhusi Kristu be amlulik, tama iha Povu saserdotál katak comunidade sarani no tenke halo sira-nia moris sakrifísiu kontínuu hahi'in, agradesimentu no domin nian.

Testu ne'ebé ohin propoin mai ita pertense ba parte datoluk surat nian (Heb 5,11-10,39). Iha ne'ebá, autór refleto kona-ba karakteristiká prinsipál Kristu nian nu'udar amlulik.

MENSAJEN

Iha mundu Testamentu Tuan nian, ema ne'ebé hakarak selebra ninia komuñau ho Maromak, eh hatudu ninia entrega absoluta ba Maromak, eh hetan perdaun ba ninia salan sira tenke oferese balada ida, ne'ebé amlulik entrega iha Jahwéh nia liman... Maibé sakrifísiu ne'e, hanesan profeta barak haktuir tiha ona la iha folin (kf. Is 1,11-13; Jr 6,20; 7,22; Os 6,6; Am 5,21-25; Miq 6,6-8), basá sira mak ritu esternu de'it, ne'ebé la korresponde ho atitude sinsera fuan nian husi ema ne'ebé oferese sakrifísiu ne'e.

Hodi tau iha Jezús niaibun liafuan salmista ida nian (kf. Sl 40,7-9), autór "Surat ba Ebreu sira" afirma katak, iha mundu "aliansa" foun nian, la'ós ona sakrifísiu balada nian mak realiza komuñau ho Maromak, entrega absoluta fiar-na'in nian ba Maromak, perdaun salan nian; Jezús nia enkarnasaun, Kristu rasik ninia saran An tomak. Ninia respeitu absolutu ba Maromak nia projetu no ba Maromak nia hakaran mak halo ema hakbesik Maromak no iha relasaun ho Nia. Ema ne'ebé hakarak deskobre Aman no hakbesik Nia, hateke ba Jezús; basá Jezús hanorin ita, ho Ninia obediénsia ba Aman nia projetu, oinsá karakteristiká relasaun filiál nian ho Maromak.

EVANJELLU – Lc 1,39-47

Testu ne'ebé propoin mai ita ohin halo parte ba "Evanjellu Infánsia" nian. estudu atuál sira ko'alia kona-ba "Evanjellu Infánsia" nian nu'udar jéneru literáriu espesiál, ne'ebé bele hanaran "homologese": ne'e mak jéneru ida ne'ebé la pretende sai relatu fiél kona-ba akontesimentu sira, maibé katekeze ida ho intensaun atu haklaken realidade salvífika sira ne'ebé fiar haklaken kona-ba Jezús (katak Nia mak Mesias, Maromak nia Oan-Mane,

Maromak ho ita. Jéneru literáriu ne'e dezenvolve ho forma narrasaun nian no uza téknika *midrash haggádico* nian (téknika ida leitura no interpretasaun Testamentu Tuan nian ne'ebé rabbi judeu sira uza iha époka ne'ebé ema hakerek Testamentu Foun). "Homologese" prefere utiliza tipolojia sira: faktu no ema Antigu Testamentu nian hetan ninia korrespondénsia ho faktu no ema sira Testamentu Foun nian. Iha nia laran, kahur elementu apokaliptiku sira (aparisaun sira, anju sira, mehi sira), ho finalidade atu lori narrasaun ba oin no esplisita ideia teolójika sira ho katekeze kona-ba Jezús. Elementu sira kahur malu hanesan ne'e mak ita hetan iha Evanjellu ohin nian: la'ós informasaun "jornalístika" ida kona-ba faktu konkritu, maibé katekeze ida kona-ba Jezús, halo hodi hahú husi referénsia sira foti husi mensajen no promesa Testamentu Tuan nian.

MENSAJEN

Referénsia dahuluk mak indikasaun katak, ho Maria nia saudasaun ba Isabel, kosok-oan (João Batista) haksoit ho ksolok iha nia inan nia knotak. Ne'e mak indikasaun teolójika ida: ba Lucas, Jezús mak Maromak ne'ebé bá hasoru ema sira, no iha mensajen ida salvasaun nian ne'ebé konkretiza iha Maromak nia promesa sira ba bei-ala sira; nune'e, Jezús nia prezensa provoka ksolok, ksolok boot ba sira ne'ebé hein konkretizasaun ba Maromak nia promesa sira no haree iha Jezús realizasaun promesa kona-ba mundu ida justisa nian, domin nian, dame no ksolok nian ba ema hotu. Lihusi Jezús, Maromak oferese salvasaun ba ema hotu; ne'e mak motivu ba ksolok boot, ne'ebé ema sira hotu ne'ebé hein konkretizasaun promesa Maromak nian koko.

Hafoin, ita iha Isabel nia resposta ba Maria nia saudasaun: "Ita di'ak liu fetu hotu-hotu". Ne'e mak liafuan sira ita hetan iha "knananuk Débora" nian (kf. Jz 5,24) atu celebra Jael, fetu ne'ebé maski ho ninia frajilidade, sai instrumentu Maromak nian atu liberta Povu husi opresór hanaran Sísera nia liman. Maria – iha ninia frajilidade – sai Maromak nia instrumentu atu konkretiza salvasaun/libertasaun ema sira-nian.

Ikusnian, ita iha Maria nia resposta: "ha'u nia klamar hahi'i Na'i...". Maria nia resposta foti fali salmu ida agradesimentu nian (kf. Sl 34,4), atu agradesese Jahwéh basá proteje ema ki'ik sira no so'i sira, maski ema kbiit-na'in sira hatudu sira-nia kbiit. Ne'e mak salmu ida esperansa no konfiansa nian, ne'ebé haboot Maromak nia preokupasaun ba ema kiak sira vítima injustisaa no opresaun nian. Nia hatudu katak, Jezús nia prezensa, lihusi fetu simples no frajil ne'e, mak sinál ida Maromak nia domin nian, ne'ebé preokupa atu lori libertasaun ba ema hotu ne'ebé sai vítima ema kbiit-na'in sira-nian no injustisa ema sira-nian. Ho Jezús, to'o mai ita tempu libertasaun nian, dame no ksolon nian ne'ebé profeta sira horiuluk kedas haklaken.